



**PRIMEIRO
MINISTRO**

**DISKURSU SUA ESELÊNSIA PRIMEIRU-MINISTRU
REPÚBLIKA DEMOKRÁTIKA TIMOR-LESTE,
DR. RUI MARIA DE ARAÚJO,
IHA OKASIAUN SERIMÓNIA LANSAMENTU
PROJEKTU “PROSESAMENTU LIXU BA ENERJIA”**

**Tíbar
Loron 22 fulan Maiu tinan 2015**

Exmo. Señor Ministru Planeamentu e Investimentu Estratéjiku
Exmo. Señor Ministru Komérsiu, Indústria no Ambiente
Exmo. Señor Administrador Munisípiu Likisá
Exmo. Señor Presidente Shun Hsin Lda
Exmos. Kolegas Membrus Governu
Komunidade Tíbar nian tomak,

Ohin ita marka pasu importante ida ba dezvoltimentu sustentável ba ita nia rai. Lansamentu projektu “Prosesamentu lixu ba enerjia” sai hanesan preokupasaun boot iha ita nia sékulu ne’e, liliu ba sustentabilidade ambiental. Projektu ida ne’e fó mós kontribuisaun hodi halo melloria ba iha área prioritáriu balun, iha ita ninian rai, hanesan saúde públika.

Sustentabilidade ambientál implika ita hola desizaun no foti asaun ne’ebé bele proteje natureza, ne’ebé hamoris meu-ambiente ida ne’ebé diak ba dezvoltimentu ema moris (ser humano)no harmonia hamutuk ho ai-han moris sira seluk.

Preokupasaun ida ne’e haktuir kedas husi ita nia beiala sira. Ita mós hatoman an tiha ona atu moris ho relasaun ne’ebé armoniozu ho ambiente, utiliza forma ida ne’ebé ekilibradu ho respeito ba natureza sira. Nune’e, tuir lolós, ita hakarak kontinua mantein nafatin relasaun ida ne’e.

Agora dadaun ita moris iha situasaun ne’ebé krusial. Momentu ne’ebé ita hola desizaun ba aban bain rua, sei determina susesu ka fallansu ba ita nia aspirasaun iha dezvoltimentu sustentável ne’e. Mundu tomak afeta ba bebeik ho poluisaun, efeitus ladiak sira ne’e ita komesa sente dadauk ona, ba ita nia saúde no mós iha klima.

Kuantidade lixu ne’ebé ita ema moris produz aumenta boot ba bebeik, no laiha sinal ida hodi hatudu katak kuantidade ne’e atu tún ona. Iha estimasaun ida katak, la to’o sékulu ida ita produz lixu toneleda tokon 11 loron loron. Ne’e hatudu katak, agora dadaun, populasaun iha mundu tomak bele produz lixu dala tolu liu, ne’ebé atualmente iha ona. Ho volume lixu ida ne’e, iha konsekuensia boot ba meus ambientais, ekonómikas no sosiais. Timor-Leste nu’udar país ida ne’ebé sei jovem iha duni prioridades barak, maibé ita labele husik sustentabilidade ambiental halai husi prioridade sira ne’e.

Jestaun lixu liliu iha fatin urbanos iha ita nia rai ne’e desafiu bo’ot ida ba ita. Tuir estudu ida ne’ebé Banku Asiátiku halo ba dezvoltimentu, iha tinan 2014, sura ida deit iha Dili, katak loron loron foer sira ne’ebé lori ba soe iha foer fatin iha Tíbar, hamutuk besik tonelada 120. Haré ba ita nia populasaun ne’ebé sae ba bebeik, bainhira ita laiha kapasidade atu transforma lixu sira ne’e, no haré dezvoltimentu sektor indústria, komérsiu, agrikultura no infrastrutura, ho aumentu ekonómiku mak halo volume kompras sae maka’as – volume ida ne’e bele atinje to’o tonelada 500. Bainhira ita la halo asaun konkreta hasoru situasaun ida ne’e, ita sei iha dezafiu boot liu tan iha futuru.

Buat sira ne’e hotu, sai preokupasaun ne’ebé rejista ona iha Governu nia polítika, hanesan ba iha matéria qualidade ambiental no jestaun ba lixu iha fatin urbanu sira. Timor-Leste introduz ona diretivas hodi bele solusiona kestaun sira ne’e, promove

estrategia ida ba jestaun lixu, la preokupa deit no rekollamentu ne'e maibe no mos oinsa halo tratamentu no reutilizasaun.

Eselênsias
Señoras no Señores

Nune'e, hau haksolok bainhira ita bele konkretiza ona etapa importante boot ida ba iha ita nia rai, hanesan lansamentu ba projektu inovadora ida, ne'ebé ita planeia kleur tiha ona no ohin loron ita bele konkretiza.

"Prosesamentu lixu ba energia", hatun risku ba saude pública, liu husi rekollamentu, prosesamentu no insinerasaun ba lixu, nune bele hatun proliferasaun ba moras no parasitas.

Prosesu ida ne'e mos hamenus impaktu negativu ba nivel kontaminaun ba rai isin, rai fis no bé – kontaminaun ida ne'e konstitui risku ba saude pública no ba qualidade ambiental. Buat ne'ebé maka la halo diak ba kondisaun saude no ambiente, la'os deit impactu ida ba qualidade vida sidadaun sira nian, maibe fó mos impacto negativus transversais ba prazu médiu no naruk, hanesan iha sektor turismo, agrikultura no economia.

Se ita adopta tipu tratamentu ba lixu sira ne'e, ita mos reduz dadauk ona lixu nia kuantidade. Ita labele haluha katak sasan sira ne'ebé ita soe tiha ona ne'e, ita hanaran "lixu", labele hanoin katak lixu ne'e foer ida. Tuir prosesamentu ita atu halo dadauk ne'e ita sei transforma no konverte lixu ka foer ne'ebé maka ita la presiza ona ba enerjia elektrika no halo fali ba buat seluk ne'ebé maka ita nesesita.

Nune'e, estasaun tratamentu lixu ida ne'e, bele produz enerjia electrika ida ho kapasidade 25MW, mak bele oferese enerjia ba nesesidade lokal sira no fo benefisiu ba comunidade.

Timor-Leste, ho implementasaun ida ne'e no mekanismu sira seluk kona ba tratamentu lixu no halo produsaun ba enerjia, neneik-neneik bele ona substitui, fonte enerjia sira seluk mak depende ba rekursus ne'ebé ita labele renova, hodi nune'e bele atintje formas ba desenvolvimentu ekolojikamente sustentável.

Ita halo lixu nakfilak ba fonte enerjia, ne'e hanesan alternativa ida hodi transforma lixu ba hahalok diak no ekonómia rentável.

Eselênsias
Señoras no Señores

Nune,e ita bele hatete katak jestaun lixu ne'e dezafiu ida, maibe fo mos oportunidades. Ita bele hatete katak, lixu mos iha valor. Iha kasu ne'e lixu mos fo oportunidade ida, hodi ita bele realiza atividade económicas ne'ebé hamosu empregu ba comunidade sira. Ho sistema ne'ebé hala'o rekollamentu, manuseamentu, triajem no prosesamentu lixu nian, projetu ida ne'e sei loke kampu servisu ba ema nain 300, nune'e mos sei fó formasaun no profesionalizasaun ba traballador sira ne'e.

Tanba ne'e, hau hakarak hato'o katak papel sektor privadu, ne'ebé hamutuk ho Governu foti solusaun estratéjiku ida ne'e hodi rezolve problema lixu iha Timor-Leste, no mós promove forsa vontade servisu ba timor oan sira.

Molok atu hakotu, hau hakarak subliña iha ne'e katak Governu ho sektor privadu, ho objectivu atu hadiak sistema jestaun ba lixu no kualidade ambiental ita nia rai, ita hotu hotu manan. Ne'e sai hanesan intervensaun ne'ebé efikaz no negósiu sustentável ida maka lori solusaun estratéjika ida, hanesan geradora ho benefisius ba Timor-Leste.

Hau mós hakarak hato'o, hodi Governu nia naran no povu tomak, agradesimentu espesial liu ba comunidade Tíbar, ne'ebé ho espírito boot sidadania nian, ho laran luan hodi simu konstrusaun indústriia ba prosesamentu lixu, ne'ebé bele kontribui no hadia timor oan sira hotu nia moris diak ho kualidade.

Ikus liu, iha oportunidade ida ne'e, hau agradese mós ba ex-Primeiru-Ministru Maun Bo'ot Xanana Gusmão nia hanoin hodi bele hamosu projetu ida ne'e.

Bem hajam!

Dr. Rui Maria de Araújo
Loron 22 fulan Maiu tinan 2015